

## 2 Tsimoot Ta jawén Tsimoot hã Paw-Ro ma erih do hahÿÿh

<sup>1</sup> Paw-Ro ÿ ti hÿÿh, P'op Hagä Do karën do hyb n'aa Kristo Jesus mejũũ do see ÿ bahado däk doo. ÿ tamejũũ ÿ baher'oot hyb n'aa ta wób sa hã, Kristo Jesus hã ji h'yy kae bä, hÿ pong jé ta pa had'yyt hẽ ji bawät da. Ti né hẽ ti ji hã taky n'aa enooh doo.

<sup>2</sup> Õm ÿ edëng Tsimoot, tah ÿ hadoo doo, ÿ kamahãn doo.

ÿ karën P'op Hagä Do ër Yb, Jesus Kristo ër Wahë N'aa na-ããj hẽ ky en'yym a hã. ÿ karën õm rat'yyd mehĩn, baad õm rah'yyb n'yym.

*Taw'ããts hẽ h'yy ganajëng doo me ji gadoo ji ahoop do ky n'aa hahÿÿh*

<sup>3</sup> P'op Hagä Do wë ÿ h'yy gadajang a hyb n'aa. P'op Hagä Do wë ÿ moo wät hëp ÿ hanãm doo me, wahëh ÿ makũ rabahed'oo do paa da. ÿ hyb n'aa es'ee had'yyt hẽ õm ÿ ky n'aa etsëë bä, adëb bä ÿ ky n'aa etsëë bä, atsëm ÿ ky n'aa etsëë bä.

<sup>4</sup> Tak'ëp ÿ karën õm ÿ bahegãã paawä, tak'ëp ÿ tsebé hyb n'aa paawä. Hyb n'aa manabaan hã ÿÿ mabaoot do ër ketyn hõm bä.

<sup>5</sup> Baad ÿ hyb n'aa esee nyy da t'öp madäk doo me mah'yy ka'eeh Jesus hã. ÿ hapäh, a hoonh Roots häd näng do hadoo, a ÿÿn Ew-Nis häd näng do hadoo né hẽ mah'yy kae däk.

6 Ti hyb n'aa, taw'ãäts hë p'aa hënh mah'yy kadaw'uuh, baad mamoo wät hyb n'aa P'op Hagä Do Sahee anoo do paa a hã, a nuu gó moh yÿ y dasooh noo gó.

7 Ta ti y wén näng, P'op Hagä Do Sahee dooh ji eÿm bä tan'oo bä. Ji h'yyb tym tahej'oonh, ta karën do ji bahajaa hyb n'aa. Tanoo ji kamahän doo. Tanoo ji hã ji bahajaa hyb n'aa ji h'yy keb'aah nesaa do hã.

8 Ky hebyy manä Jesus ër Wahë N'aa ky n'aa maher'oot do hã. Nu mebyy manä hëp y n'aa, Kristo hyb n'aa y radawäts gëët do hyb n'aa. Taw'ãäts hë P'op Hagä Do hejój me mabahoop nemon yÿ ër rarejä bä panyyg hanäm do hyb n'aa.

9 P'op Hagä Do né hë ti ër hed'ëëp do paa banesaa do mahänh. Ër tasëew hõm tsyt hë ta wë, takarën doo da ër babok hyb n'aa. Ji mo haj'aa jawén nado ji tabasëew hõm. Ji tawén sëew hõm, sahõnh hë tadu dahäng do pooj jé tii da takarën do hyb n'aa. Kristo Jesus hyb n'aa taky enyym ër hã, ër takamahän, nes'aa né paawä ëër.

10 Hÿy kä, Kristo Jesus, ji h'yyb tym dëeb bahyng do hã ër hã taky enyym, ër takamahän, ër hã tametëeh. Kristo ahäj jëng dajëb hejój paah. Ër da genyyh. Ta ky n'aa hanäm do hã tametëeh ër hã ji edëb had'yyt hë do tyw n'aa.

11 P'op Hagä Do y tasëew hõm, ta ti ky n'aa rod, Jesus mejüü do na-ãäj hë y bahadoo hyb n'aa, y ma metëek hyb n'aa ta ky n'aa.

12 Ti hyb n'aa y bahoop y radawäts gëët doo. Ti hado né paawä yÿh, dooh y hebyy bä ta ti hyb n'aa. Y hapäh ta ti ta hã y h'yy ka'eeh doo, Kristo. Baad y

bahapäh ta ti tahajaa baad tabahag'ääs ta ky n'aa hä ÿ tanoo doo, tamatëeh bä kä.

13 Menyyw had'yyt hë a h'yyb gó a hä ÿ ma met'ëëg wät doo. Taw'ääts hë hadoo do ky n'aa né tii. Taw'ääts hë Jesus hä mah'yy kae had'yyt hë. Taw'ääts hë sahõnh hë makamahän had'yyt hë. Ær hajaa Jesus hä er h'yy ka'eeh, ta wób er kamahän, séd er h'yyb hedoo do hyb n'aa Kristo Jesus hä.

14 P'op Hagä Do Sahee er h'yyb gó hawät do hejój me baad manä a hä P'op Hagä Do anoo do paah, ta ky n'aa, ta see hadoo tanadoo hyb n'aa da.

15 Mahapäh né hë, sahõnh hë Jesus hä h'yy ka'eeh do Asija häd näng do häj n'aa bä hena do ÿ raberéd wät. Pigeer, Emok häd enäh doo, ti na-ääj né hë ÿ reréd wät.

16 Æ karën Tak'ëp Hyb N'aa Jawyk Do t'yyd mehĩn Onesip, ta tób yt haj'eenh do na-ääj né hë, hajõõ nuu me ÿ h'yy gadajang tan'oo bä do hyb n'aa. Dooh tanu mebyy bä hëp ÿ n'aa, ÿ radawäts gëët do hä.

17 Roma bä takajaa noo gó, baad ÿ tabesoos jé pad'yyt hë, ÿ tawyyd kän.

18 Æ karën Jesus Kristo, er wahë n'aa, t'yyd mehĩn Onesip hä, sahõnh hë P'op Hagä Do ky n'aa etyy noo gó. Baad mabahapäh né hë tak'ëp ÿ Onesip masa paa Epeso häd näng do panang bä.

## 2

1 Õm kä tah ÿ hadoo doo, tak'ëp h'yy kahejój Jesus hä mah'yy ka'eeh do hä. Õm da Kristo Jesus h'yyb hej'oonh, ky ennym do hyb n'aa a hä.

<sup>2</sup> Ta ti mamaa napäh do ÿ metëek doo, hajõk her'oot doo, ÿ karën matab'eës ajyy baad hadoo do sa hä, ta wób rama metëek hajaa doo kä.

<sup>3</sup> Warahén baad habok do raky daheeh sa wahë n'aa kyyh, ragadoo na-ãäj hë rahoop doo. Ti hadoo taw'ãäts hë nemon ÿÿ magado Tak'ëp Hyb N'aa Jawyk Do hyb n'aa ji ahoop do sa mo haj'aa, ji ky n'aa rarejäã do na-ãäj né hë.

<sup>4</sup> Warahén baad habok doo, dooh rah'yy kawapëen bä warahén nadoo do ramoo bok do hä. Tii d' rawén d'oo, sa wahë n'aa rah'yyb en'yyim do hyb n'aa. Õm na-ãäj hë, Jesus Kristo warahén n'aa hadoo mabahadoo do hyb n'aa, h'yy kawapëen manä Jesus ër wahë n'aa manejüü do hä.

<sup>5</sup> Jé tsyym kas'ÿÿ doo, wajaah doo, dooh tagado bä j'aa ketsë do sãm, kas'ÿÿ do ky n'aa jaw'yyk do taky nadahé bä. Ti hyb n'aa taw'ãäts hë kas'ÿÿ doo, waj'aaah do hadoo mabad'oo. Taw'ãäts hë baad maky daheeh Jesus õm tamejüü doo.

<sup>6</sup> Taw'ãäts hë jé gëew gó tak'ëp moo wät doo, pooj jé tagadoo ta joom s'ëëb. Taw'ãäts hë tii d' mabahadoo. Tak'ëp baad ub mama met'ëeg, mamaher'ood Jesus ky n'aa, ta sãm magadoo hyb n'aa.

<sup>7</sup> Mahyb n'aa newë ta ti a hä ÿ her'oot doo. Tii d' madoo bä, õm P'op Hagä Do h'yy gan'yyh sahõnh hë mabahapäh hyb n'aa takarën doo.

<sup>8</sup> Jesus Kristo mahyb n'aa es'ee, ganä wät do dajëp do paa P'op Hagä Do an'oo bä, Dawi makü panaa paah. Ti ky n'aa hanäm do rod n'aa ÿÿh.

<sup>9</sup> Ti ky n'aa hyb n'aa ÿ rarahejäã, ÿ rawén moo maw'yyd däk haak sapuuw hadoo doo me. Mo haj'aa dahej'ëëp do hadoo ÿ ran'oo bä. Tii d'

né paawä ŷ rabad'oo, P'op Hagä Do kyyh dooh takamaw'yyd bä. Dooh mesoo péh. Ta ti awäd had'yyt hē badäk hahÿ haw'ãäts hē.

<sup>10</sup> Ti hyb n'aa ŷ gadoo né hē ŷ ahoop do sa mo haj'aa. ŷ wén gadoo tii, P'op Hagä Do asëew hōm do sa hyb n'aa, ramaa napäh hyb n'aa ta ky n'aa, sa h'yyb Kristo Jesus bed'ëëp hyb n'aa, banäm doo hēnh ta sii ta bag tak'ëp gabarëeh do mahang rababoo had'yyt hē hyb n'aa.\*

<sup>11</sup> Te hub né hē hahÿÿh:

Kristo hyb n'aa ji dajëb bä,  
ta sii ji baboo däk da.

<sup>12</sup> Ji gado bä had'yyt hē ji ahoop do Kristo hyb n'aa,  
ji bag'ãäts da ta sii.

Kristo ji ky n'aa jejën bä,  
ji na-ãäj hē ta ky n'aa jejën da P'op Hagä Do hä.

<sup>13</sup> Dooh né paawä baad ji awäd bä had'yyt hē  
Kristo sii,

ji tahagãä had'yyt hē,  
ji takamahän had'yyt hē.

Dooh tahaja ta daaj hē taky kehÿÿd bä.

*Taw'ãäts hē ji moo wät P'op Hagä Do gen'aak do  
ky n'aa hahÿÿh*

<sup>14</sup> Mamaher'ood ta wób sa hã a hã ŷ her'oot doo. P'op Hagä Do matym gó mamejō sa hã raky kaned'aak hyb n'aa kyy p'ãä. Dooh baad tado bä ji ky kedak doo. Taw'ãäts hē nado ti maa new'ëë do sa hã. Tarejãä maa new'ëë doo.

---

\* **2:10** Paw-Ro ky dawuh bä paawä tanahoop hyb n'aa, dooh paawä raky n'aa napëë bä Jesus ky n'aa. Dooh redëb bä tii bä P'op Hagä Do wë. Ti hyb n'aa Paw-Ro gadoo tahoop doo.

15 Taw'ääts hē baad mama met'ëeg P'op Hagä Do ky n'aa, P'op Hagä Do gadoo hyb n'aa mamoo wät doo. Taw'ääts baad hadoo do moo wëed mabahadoo. Baad ÿ wén karēn mamoo wät, manu manebyng hyb n'aa mamoo wät do hã, baad ub mama metëek hyb n'aa baad hadoo do ky n'aa.

16 Mamaa newë manäh, P'op Hagä Do nahapäh do her'oot doo da her'oot doo, daap hadoo do ky n'aa her'oot doo. Er'ood manä sa sii. Dewë hã magyys hē ta ti hedoo do rababoo däk P'op Hagä Do mahãnh.

17 Kah'üüm rama metëek doo, nahëe saraa ji hã ket'ëe hõm do hadoo. Ti hyb n'aa, awäd manä sa mahang. Imenëw, Piret häd enäh do ta ti hed'oo do sa wób.

18 Reréd hõm baad hadoo do ky n'aa. Èr ganä wät paah, sa nooh. Dooh ji ganä wäd bã ta jawén, sa nooh. Daap ta tii d' rama metëek. Ti hyb n'aa sa kyyh maa new'ëe do wób dooh baad raky dahé boo P'op Hagä Do panyyg.

19 Tii d' nado P'op Hagä Do kyyh. Te hub né hē tii. Tahajaa ta kyy hã ji h'yy kasadëe bã. Dooh taky kahÿÿd bã. Hahÿÿ da P'op Hagä Do kyy kerih doo: “Tak'ëp Hyb N'aa Jawyk Do hapäh ta hã h'yy ka'eeh doo.” Hahÿÿ da ji tamejüü: “Taw'ääts hē nesaa do mahãnh dawëe rakan'yyh Jesus sa wahë n'aa ramaneëenh doo.”

20 Tak'ëp ma näng do tób bã ti anäng waa hood k'ääts tég gabarëeh do s'ëeb ta wób, k'ääts tég hawak do s'ëeb ta wób. B'aa s'ëeb, tsäng s'ëeb hedoo do ta wób. Ky n'aa gebah do s'ëeb, hanäm do hood tii. Ky n'aa ganebah do s'ëeb, hanäm do hood nado tii.

<sup>21</sup> Ti hadoo Jesus hã h'yy ka'eeh do sa hã. Ji daaj hẽ baad ji kanã bã nesaa do mahãnh, hanãm do hood hadoo ji. Hanãm do ji moo wãt hyb n'aa, ji P'op Hagã Do asëew hõm tsyt hẽ. P'op Hagã Doo, ër Kariw N'aa ma hã ër hajaa ër moo boo bã tii bã, tsyt hẽ ër tabasëew hõm do hyb n'aa.

<sup>22</sup> Ti hyb n'aa baad kanã pahëew h'yyb hadoo do nesaa do hã mahãnh. Taw'ããts hẽ baad hadoo do hã mah'yyb dæg. Mahũũm had'yyt hẽ Jesus hã mah'yy ka'eeh doo. Mahũũm had'yyt hẽ P'op Hagã Do makamahãn doo, a da hadoo do makamahãn do na-ããj né hẽ. Mahũũm had'yyt hẽ a h'yyb hanãm do sa hã. Tii da ÿ karën mabad'oo ta wób sa sii, h'yyb nãm doo gó Jesus hã raber'oot do sa sii.

<sup>23</sup> Mamaa newë manã daap ke'aanh doo, daap kaher'oot doo. Mahapäh ti né hẽ du n'aa kawajããn doo gó raky kedak doo.

<sup>24</sup> P'op Hagã Do sii moo heb'ook doo, Jesus hã h'yy ka'eeh do sa wahë n'aa, taw'ããts hẽ dooh ky ked'aak do rado bã. Taw'ããts hẽ kaja hẽ denaa hẽ sa h'yyb ramahũũm sahõnh hẽ sa wë. Taw'ããts hẽ da baad rama metëek. Taw'ããts hẽ dooh renyyw bã h'yy gaëenh doo.

<sup>25</sup> Taw'ããts hẽ kaja hẽ denaa hẽ rama metëek sa hã ganen'aak doo. Nepäh P'op Hagã Do h'yyb wareem bã, baad hadoo do ky n'aa rabahapäh, raky daheeh hyb n'aa.

<sup>26</sup> Ta tii kã baad dæg p'aa hënh sa h'yyb tym hanãm do hã kã. Baad rakanã däk tii bã sa hã Dijab† wadii do mahãnh, tamesoo do paa mahãnh.

---

† **2:26** Gereg kyy me ramaneënh Nesaa Do Yb, Dijab. “Ji taky n'aa tapa had'yyt doo”, tahanäng pé ti Dijab.

Ta ti hedoo do Dijab mesoo do paa hadoo, takarēn do ramoo bok hyb n'aa.

### 3

*Sahōnh hē gawatsig hōm do pooj jé panyyg n'aa hahȳȳh*

<sup>1</sup> Mahyb n'aa es'ee ti hahȳȳh: Sahōnh hē gawatsig hōm do pooj jé, tak'ēp da tanesaa ji hã.

<sup>2</sup> Sa hã hē had'yyt hē rahyb n'aa newëë da ti noo gó. Rahyb n'aa hüüm magyys hē da sa ma. Sa daaj hē raj'aa etsë da. Sa hã hē rah'yy kasab'ee da. P'op Hagä Doo, ta wób na-ãāj hē raky n'aa rejãã da. Sa yb, sa ȳyn, dooh d' raky dahé bã. Dooh d' taw'ããts hē tado sa hã ragadoo doo. Dooh da P'op Hagä Do rawehëë bã.

<sup>3</sup> Dooh da rakamahãn péh. Maneban sa da hadoo do sa mo haj'aa. Ta wób da ranu mer'oot, raky n'aa rejãã da. Dooh da sa h'yyb ramedug bã nesaa do hã. Dooh d' rat'yyd mehĩĩn péh. Sahōnh hē da rarejãã rakarēn doo da. Dooh d' ragenaag bã baad hadoo doo.

<sup>4</sup> Baad raky kenäw né paawä, ta wób da raky n'aa her'oot sa majĩĩ hã. Daap hē ragado nyyh sa h'yyb tym. Sa daaj hē sa hã rabahajaa, sa hã. Rah'yy karēn do rakamahãn da. Dooh da P'op Hagä Do hã rakamahãn bã.

<sup>5</sup> P'op Hagä Do karēn do ramoo bok ji edoo né paawä, j'ooj madäk doo me tii d' rabad'oo. P'op Hagä Do hejój raty n'aa ges'yyk. Dawëë kanä da ta ti hedoo do sa mahãnh.

<sup>6</sup> Ta ti rah'yyb wedii ragadoo hyb n'aa sa tób bã. Tii bã rahajaa rawedii ȳȳj wób h'yy gatamah doo, ta ti ȳȳj raky sũüt hyb n'aa rahe'oot doo. Ta ti



hedoo do ŷŷj hajõng sa hã nesaa doo, nesaa do jawén sa h'yyb tym bawät do hyb n'aa.

<sup>7</sup> Ta ti hedoo do ŷŷj ta tii d' had'yyt rakarën rama kametëek, dooh paawä rahaja bã rah'yy kadawung bã baad hadoo do ky n'aa hã.

<sup>8</sup> Ta ti hedoo doo ma matëg oow, baad hadoo do ky n'aa majiĩ tii. Janes, Jãm häd enäh do hadoo tii, Mosees hã rah'yy kawapëen do paah. Baad nado wäd ta ti sa h'yyb tym. Dooh P'op Hagä Do karën wäd ta tii, heh'äät ub nadoo do hyb n'aa ta hã rah'yy ka'eeh doo.

<sup>9</sup> Sahõnh hë rah'yy genäh da sa hã. Ti hyb n'aa dooh da rahũüm bã ta bahãnh. P'ooj ub habok do paa hadoo da, Janes, Jãm häd enäh do paah.

*Taw'ãäts hë ji ky dahé had'yyt hë P'op Hagä Do panyyg ji hã rama metëek doo*

<sup>10</sup> Mahapäh né ti ŷ ma metëek doo, nyy da ŷ bawät do baad ub, h'ëed hyb n'aa ŷ bawät. Mahapäh né ti nyy da ŷ h'yy ka'eeh P'op Hagä Do hã, nyy da h'yyb jawyk doo gó ŷ bawäd wät, nyy da sahõnh hë ŷ kamahãn, nyy da h'yy ganajëë hõm doo me ŷ bawät ŷ rarejã né paawä.

<sup>11</sup> Mahapäh né hë nyy da ŷ rarejãã, nyy da ŷ bahoop do sa mooh. Mahapäh né hë ti nyy da ŷ rano n'aa masoo panang Æn-Tijoka, Ikonijo, Ris häd enäh doo bã. Sahõnh hë ta ti ŷ ahoop do mahãnh, ŷ rarejãã do mahãnh ŷ P'op Hagä Do ed'ëep.

<sup>12</sup> Sahõnh hë P'op Hagä Do karën doo da hawät do karën doo, Kristo Jesus karapee rabahadoo do hyb n'aa, rarejãã né da.

13 Nanäng ky nesaa doo, j'ooj madäk doo me ky ken'yym doo, ti bahänh däg da sa hä nesaa doo. Rawedii da ta wób, ta ti rawedii na-ãäj né da sa hä.

14 Õm kä, baad maky dahé had'yyt hē ŷ karēn, a hä rama metëek do paa hä. Mahapäh né ti baad a hä mama kametëek do paah, baad mabahapäh hyb n'aa õm ma metëek do paah.

15 Õm karapee noo gó õm rama met'ëeg wät tak'ëp hanäm do P'op Hagä Do kyy kerih doo. Ta ti õm tah'yy gan'yyh, mabahapäh hyb n'aa nyy da õm P'op Hagä Do bed'ëep Kristo Jesus hä mah'yy ka'eeh do hyb n'aa.

16 Sahõnh hē P'op Hagä Do kyy kerih doo, P'op Hagä Do né hē ti hanoo. P'op Hagä Do né hē ti h'yy gan'yyh raberih hyb n'aa. Ta tii hä baad ub panyyg hanäm do ji metëek. Ta tii hä ji metëeh ta wób sa hä resõöts hõm doo. Ta tii hä ji ma metëek ny hadoo do ji eréd hõm doo. Ta tii hä ji metëeh nyy da P'op Hagä Do karēn doo da ji bawät.

17 Ti hyb n'aa kä, ramaa newë bä, raky dahé bä, baad né hē P'op Hagä Do karapee rabahajaa ramoo boo bä sahõnh hē baad hadoo do P'op Hagä Do karēn doo.

## 4

1 Kristo Jesus matëeh bä kä taky n'aa etyy da sahõnh hē badäk hahÿÿ hä habong doo, hedëp doo, dejëp do na-ãäj hē. Ti awät do hyb n'aa, tadu doo do hyb n'aa tabag'ãäs doo, P'op Hagä Do matym gó, Kristo Jesus matym gó na-ãäj hē õm ŷ mejüü hahÿÿh:

2 Maher'ood panyyg hanäm do sahõnh hē sa hä. Maher'ood sa hä rakarēn bä ramaa newë bä,

rakanarĕn bā na-ããj né hĕ. Maky geãm sa hã baad ranaboo bā. Manabuuĵ gedo baad nadoo do moo bok doo. Mah'yyb tsebĕ sa hã, baad hadoo do ramoo bok hyb n'aa. Taw'ããts hĕ h'yyb jawyg gó mama met'ĕĕg sa hã.

<sup>3</sup>Tii d' ŷ wén karĕn mabad'oo, ti awät do hyb n'aa ti noo gó dooh rakarĕn bā ramaa newĕ bā panyyg heh'äät ub do hã ma kamahetĕk doo. Resoos da sa ma matĕg n'aa, ragen'aak do ramaa metĕĕk hyb n'aa sa hã. Tii da rawén d'oo, rah'yy karĕn doo da rababok do hyb n'aa.

<sup>4</sup>Raty n'aa ges'yyk da baad hadoo do ky n'aa. Ramaa newĕ däg kán da panyyg daap menyyh doo.

<sup>5</sup>Ōm kã, baad menyyw had'yyt hĕ a h'yyb tym kã. Magado Jesus hyb n'aa ji ahoop do sa mo haj'aa, ji ahoop do ji raky n'aa rejãã doo. Maher'ood Jesus ky n'aa hanãm do ta wób sa hã. Baad mamoo wäd. Magawatsiig hõm sahõnh hĕ, a hã P'op Hagä Do anoo do mamoo wät do pan'aa.

<sup>6</sup>Tii d' ŷ wén karĕn mabad'oo, edaa däk do hyb n'aa ŷ radaj'ĕĕp. P'op Hagä Do hã ŷ kan'oo däk ŷ dajĕp bā.

<sup>7</sup>Tak'ĕp wajaah doo, tsyym kas'ŷŷ do hadoo paa ŷŷh. Tak'ĕp ŷ moo wäd wät Jesus ky n'aa ŷ her'oot do hã. ŷ haja däk hã ŷ P'op Hagä Do karĕn doo. Tsyym kas'ŷŷ doo, wajaah do kajaa do hadoo ŷŷh. Dooh paa hĕp ŷ ŷ eréd bā Jesus hã ŷ h'yy ka'eeh doo.

<sup>8</sup>Hŷ jawén, p'aa hĕnh Jesus bahyng bā, ŷ gadoo da ŷ moo wät do sãm, P'op Hagä Do karĕn doo da ŷ moo wäd wät do sãm. Jesus Křisto, baad had'op doo, nes'õõs doo me sahõnh hĕ sa hã ky n'aa etyy

doo, anoo da hã ÿ tii. Hã ÿ had'yyt nado tabanoo. Tanoo né da ta hã baad gad'aa do sa hã na-ãäj né hẽ.

*Tsimoot hã Paw-Ro maher'oot nyy d' rabad'oo ta hã ky n'aa hahÿÿh*

<sup>9</sup> ÿ karẽn paawä nayyw hẽ mabana wẽ ÿÿ,

<sup>10</sup> Demas ÿ teréd wät do hyb n'aa. Badäk hahÿÿ hã habong do P'op Hagä Do hã h'yy kana'eeh do rah'yyb padëek do hã tah'yyb däg däk, takamahän kãn, ÿ tawén eréd hõm. Tesaronika hẽnh tabahõm. Ær hÿÿj hadoo do Keresẽn häd nãng do ahõm Garata häd nãng do häj n'aa hẽnh. Tiit ahõm Dar-Masija hẽnh.

<sup>11</sup> Jããm né Rukas haym hata ÿÿ. Mabana bä da, ÿ karẽn mamana a sii Maah-Ko. ÿ karẽn ÿ tamoo masa.

<sup>12</sup> Tikiko ÿ mejõ hõm Epeso panang hẽnh tabahõm hyb n'aa, t'ĩ hẽnh tamasa hyb n'aa.

<sup>13</sup> Mabana bä da mamana a sii saror ÿ hebaan doo, aj'yy Kar-Pos häd nãng do wẽ ÿ eréd däk doo, panang Torowas häd nãng doo bä. Mamana na-ãäj hẽ ma kahé bãh kerih doo, kap'õøj däk doo. Mamana na-ãäj hẽ ta byyh s'ëeb ta hã kerih do na-ãäj né hẽ. Ta ti né tak'ëp ÿ karẽn up doo.

<sup>14</sup> Aresãn, sapaar s'ëeb moo hew'ëet doo, hajõng nesaa do tamoo wät hã ÿÿ. Tak'ëp Hyb N'aa Jawyk Do ky n'aa etyy da tii.

<sup>15</sup> Baad mamatakä õm Aresãn narejãã hyb n'aa. Tak'ëp né hẽ tahyb n'aa wareem Jesus ky n'aa er her'oot do hã. Ær her'oot do majĩĩ né tii.

<sup>16</sup> Jããm né hẽ pooj jé hã ÿ rakamaj'ĩĩ do ky n'aa ÿ her'oot noo gó, tabad'op hẽ ÿ rahadaa hõm ÿ

raky masa hyb n'aa paawä. Ý karĕn P'op Hagä Do mabaan hõm ti ý ramanasa doo.

<sup>17</sup> Ý né paawä neheda sa hã, P'op Hagä Do ti ý tahada, ý tah'yyb hej'oonh. Ti hyb n'aa, sahõnh hẽ Jesus ky n'aa ý hajaa ý her'oot sahõnh hẽ Judah buuj nadoo do sa hã. Ý P'op Hagä Do ed'ëep ý radajëeb mahãnh.

<sup>18</sup> Tak'ëp Hyb N'aa Jawyk Do ý ted'ëep da sahõnh hẽ nesaa do mahãnh. H'yyb nyyw gó ý tamahũũm da hỹ pong jé tabag'ããs bã. Taw'ãäts hẽ P'op Hagä Do ji j'aa etsëe had'yyt hẽ. Ýỹ. Tii d' né hẽ. Taw'ãäts hẽ.

<sup>19</sup> Mamaher'ood Pisiir, ta patug Akira daheeh, ý hyb n'aa esee sa hã. Mamaher'ood na-ããj hẽ Onesip, ta tób yt haj'eenh do na-ããj né hẽ, ý hyb n'aa esee sa hã.

<sup>20</sup> Eras baym Korĭn bã. Toropimo ý eréd sooh panang Mirét häd näng doo bã, nahëe näng do hyb n'aa.

<sup>21</sup> Ý karĕn mahyb n'aa bawaad tabahahëem do pooj jé makajaa hyb n'aa babä. Ajyy Ew-buh, Pudĕn, Rĭn häd enäh doo, ýỹnh Karaw-Dija häd näng doo, hajõk ta wób Jesus hã h'yy ka'eeh do na-ããj hẽ, õm mã rahyb n'aa esee.

<sup>22</sup> Tak'ëp Hyb N'aa Jawyk Do hã ý ky n'aa etsëe a h'yyb tym gó tabawäd had'yyt hẽ hyb n'aa. Ý karĕn P'op Hagä Do ky enyym sahõnh hẽ bẽ hã. Jããm hẽ kã.

**Pop Hagä Do Panyyg Hanäm Do Hahÿÿh**  
**The New Testament in the Nadëb language of Brazil**  
**(BR:mbj:Nadëb)**

**O Novo Testamento na língua Nadëb do Brasil**

copyright © 2011 Wycliffe Bible Translators, Inc.

Language: Nadëb (Nadëb)

Translation by: Wycliffe Bible Translators

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Nadëb

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-29

---

PDF generated using Haiola and XeLaTeX on 18 Apr 2025 from source files  
dated 31 Aug 2023  
c5681c4e-55f8-5b64-badf-af07c5e28afc